



漢書門類
三四七三號
九六函
三架
七冊

部	文	冊	冊
三五	四七	三	冊
二	七	三	冊
冊	冊	冊	冊


内閣文庫
番號 漢 3473
冊數 7 (1)
函號 315 94

315-94

0 1 2 3 4 5 6 7 8 9 10



糊などで貼り付けられている部分がめくれない箇所あり



後山先生集序

後山先生集凡三十卷。余昔錄之於仁和陳氏者。也。先生天資方毅。識見過人。加以好學不倦。故其形之於言。典重峻潔。法度森然。如天球綴輅。陳列廣庭。大劔高冠。班侍左右。其孰敢狎而玩之。雖大儒先生如晦菴者。亦咨重不置。至取其與林秀州書列之儀禮經傳通解之中。以補禮文之闕。是可見矣。然先生並世有二程夫子者。倡明道學於河洛之間。樞衣之士。幾徧天下。斯誠千載之一時也。而先生方且學文於曾南豐。學詩於黃山谷。周旋於蘇東坡。秦淮海之間。而不知遊二程之門。以學

淺草文庫

其道是以雖有所成而人猶有所憾以為持是資
而能知所從聖賢可學而至則其所可傳者豈止
於是哉此為深可惜耳潞守馬君暉者字廷震先
生同郡之名家也景仰高風購求遺藁近二十年
矣比聞予有是集欣然請錄既付於梓而併靳序
之憶昔弘治癸丑春余以南京戶部主事考績如
京師時冢宰盧氏耿公方為大宗伯余往候焉公
引而進之從容誨獎且問頃在江南有新收書否
予對以所得稽古錄范唐鑑後山集公驚曰是數
輩書吾求之不得以為亡且久矣乃今尚有之歸
日幸錄以相惠余應曰諾後竟以職務匆冗因循

未報而公逝矣今馬君託梓以傳寔不朽之盛事
恨不令公見之是書無別本校證訛字頗多觀者
以意讀之可也其每卷之首載賤姓名而題曰重
校者蓋太史公所謂附驥之意非事實也先生姓
陳氏名師道字履常一字無已號後山彭城人其
言行之詳官闕之次宋史有傳門人魏衍有記茲
不復列云

弘治十二年己未夏四月二十七日奉議大夫山
西等處提刑按察司僉事南陽王鴻儒序

近代名臣言行錄
卷八云王鴻儒
文莊公字繼學

河南人成化丁未進士仕至南京戶部尚書公督學山西以陶養為本以文藝為末
先所核而後詞華品藻高下毫髮不爽又去其書無所不讀大要以窮理致用為主
其原而審其義之所安故其所得尤博奧衍文矣五益其於六經亦

如也

新銘卷九新書三云子弟儲書正以備侍旁檢閱陳后山九右圖書日以計
論為務其志專欲以文章名後世夜與諸生會宿忽思一事必明燭繙
閱得之乃已或以為可待旦者后山曰不然人情樂因循一放過則不復
省矣故其學見博而精尤好經術非如唐之諸子作詩之外他無所知
魏衍昌世亦彭城人從后山學年五十餘見異書猶手自抄寫藏書
數千卷云

彭城陳先生集記

門人彭城魏衍撰

先生姓陳諱師道字履常一字無已彭城人幼好
學其行所知慕古作者不為進取計也年十六謁
南豐先生曾公鞏曾大器之遂受業于門元豐四
年神宗皇帝命曾典史事且謂脩史最難申敕切
至會薦為其屬朝廷以白衣難之方復請而以憂
去遂寢太學又薦其文行乞為學錄不就樞密章
公惇高其義冀來見特薦于朝而終不一往元祐
初翰林學士蘇公軾與侍從列薦乃官之俾教授
其鄉未幾除太學博士言事者謂先生嘗謁告諸

南都見蘇公為私遂罷移潁州教授紹聖初又以
餘黨罷換江州彭澤令未行丁母憂寓僧舍人不
堪其貧暨外除猶不言仕者凡四年左右圖書日
以討論為務蓋其志專欲以文學名後世也元符
三年除棣州教授隨除祕書省正字將用矣歿於
建中靖國元年十二月之二十九日年四十九友
人鄒公浩買棺以殮朝廷特賜絹二百匹嘗與往
來者共賻之然後得歸初先生學於曾公譽望甚
偉及見豫章黃公庭堅詩愛不捨手卒從其學黃
亦不讓士或謂先生過之惟自謂不及也先生既
歿其子豐登以全藁授術曰先實知子子為編次

而狀其行術既狀其行矣親錄藏於家者今十三
年顧未敢當也術嘗謂唐韓愈文冠當代其傳門
人李漢所編術從先生學者七年所得為多今又
受其所遺甲乙丙藁皆先生親筆合而校之得古
律詩四百六十五篇文一百四十篇詩曰五七雜
以古律文曰千百不分類術今離詩為六卷類文
為十四卷次皆從舊合二十卷目錄一卷又手書
之竊惟先生之文簡重典雅法度謹嚴詩語精妙
蓋未嘗無謂而作其志意行事班班見於其中小
不逮意則棄去故家之所留者止此昔漢楊雄作
太玄法言箴賦如劉歆號知文始敬之後而短毀

謂其必傳者。桓譚一人而已。先生之文。蚤見稱於
曾蘇二公。世人好之者。猶以二公故也。今賢士大
夫。競收藏之。則其傳也。奚待於術耶。後豈不有得
手寫故本。以證其誤者。則不肖之名。因附茲以不
朽為幸焉。其闕方求而補諸。又有解洪範相表闡
微彰善詩話叢談各自為集云。政和五年十月六
日謹記。

宋徽宗年号

建中靖國辛巳之冬。雲別涪翁於荊州。翁曰。陳
無已天下士也。其讀書如禹之治水。知天下之
脉絡。有開有塞。至于九川滌源。四海會同者也。
其論事救首救尾。如常山之蛇。其作文深知古

人之關鍵。其作詩深得老杜之句法。今之詩人
不能當也。子有意學問。不可不往掃斯人之門。
雲再拜受教。明年春。至京。賢士大夫。出涕相吊。
曰。無已亡矣。雲驚歎失聲。痛恨無窮。泊來彭城。
求先生詩文。且四年。僅見一二。最後得昌世所
集凡六百五篇。琮璜珩瑀。貫列大備。雲曰。幸矣。
至寶不歿。乃今有獲。因記涪翁之語。錄以示昌
世。自昔名世之士。著書立言。必賴其徒傳之。文
中子講道河汾。以續六經。房魏之倫。皆北面受
業。及登廊廟。不能顯傳其書。卒以泯絕。論者至
今惜之。昌世先生之高第。操行文章。雅善先生

之風雖隱約布韋而所立絕人不苟徇合故能
蒐拾遺文成一家之言又序先生出處之大節
其辭蔚然讀之使人凜凜增慕然先生之道必
傳於後世者昌世之力也千載之下可以知其
賢矣政和丙申正月甲午元城王雲題
讀後山詩大似參曹洞禪不犯正位切忌死語
非冥搜旁引莫窺其用意深處此詩註所以作
也近時刊本參錯繆誤政和中王雲子飛得後
山門人魏衍親授本編次有序歲月可考今悉
據依略加緒正詩止六卷蓋以注卷各釐為上
下作之有謂而存之可傳無恠夫詩之少也衍

字昌世作後山集記頗能道其出處今置之篇
首後有學者得以覽觀焉天社任淵書

後山先生集目錄

卷第一

詩七十八首

卷第二

詩二十六首

卷第三

詩一百一十首

卷第四

詩七十二首

卷第五

詩八十一首

卷第六

詩九十三首

卷第七

詩四十一首

卷第八

詩三十八首

卷第九

詩四十首

卷第十

詩三十九首

卷第十一

詩四十四首

卷第十二

詩一十七首

已上共六百七十九首

卷第十三

序九篇

卷第十四

書三十七通

卷第十五

記一十五篇

卷第十六

論四道

卷第十七

策二道

策問一十八首

卷第十八

表一十三通

啓一十三通

祭文七道

卷第十九

雜著三十六首

卷第二十

墓銘十道

墓表二道

行狀二道

神道碑一道

卷第二十一

談叢一十七條

卷第二十二

談叢四十五條

卷第二十三

談叢四十八條

卷第二十四

談叢三十五條

卷第二十五

談叢四十五條

卷第二十六

談叢四十四條

卷第二十七

理究三十七條

卷第二十八

詩話三十七條

卷第二十九

詩話四十二條

卷第三十

長短句四十九首

後山先生集目錄終

後山先生集卷第一

彭城陳師道履常著
茶陵陳仁子同甫編校
後學南陽王鴻儒懋學重校
後學彭城馬暎廷震繡梓

詩

妾薄命二首

後山自注曰為曾南豐作

二首共古文真室前集二載之

主家十二樓一身當三千古來妾薄命事主不盡
年起舞為主壽相送南陽阡忍著主衣裳為人作
春妍有聲當徹天有淚當徹泉死者恐無知妾身
長自憐

任本第一

又
葉落風不起，山空花自紅。捐世不待老，惠妾無其終。一死尚可忍，百歲何當窮。天地豈不寬，妾身自不容。死者如有知，殺身以相從。向來歌舞地，夜雨鳴寒蛩。

送外舅郭大夫槩西川提刑

丈人東南來，復作西南去。連年萬里別，更覺貧賤苦。王事有期程，親年當喜懼。畏與妻子別，已復迫曛暮。何者最可憐，兒生未知父。盜賊非人情，蠻夷正狼顧。功名何用多，莫作分外慮。萬里早歸來，九折慎馳騫。嫁女不離家，生男已當戶。曲逆老不侯。

知人公豈誤

送內

麀麇顧其子，燕雀各自隨。與子為夫婦，五年三別離。兒女豈不懷，母老妹已笄。父子各從母，可喜亦可悲。關河萬里道，子去何當歸。三歲不可道，白首以為期。百畝未為多，數口可無飢。吞聲不敢盡，欲怨當歸誰。

別三子

夫婦死同穴，父子貧賤離。天下寧有此，昔聞今見之。母前三子後，熟視不得追。嗟乎胡不仁，使我至於斯。有女初束髮，已知生離悲。枕我不肯起，畏我

從此辭大兒學語言拜揖未勝衣喚爺我欲去此
語那可思小兒襁褓間抱負有母慈汝哭猶在耳
我懷人得知

寄外舅郭大夫

巴蜀通歸使妻孥且舊居深知報消息不忍問何
如身健何妨遠情親未肯踈功名欺老病淚盡數
行書

城南寓居二首

游子莫何歸韋杜城南村秋水深可測挽衣踏行
雲道暗失歸處棲鳥故不喧牛羊閉籬落稚子猶
在門

又

潭潭光明殿稽首西方僊平生脩何行步有黃金
蓮我豈昔好徑報以履下穿洗足坐道場卒卒此
何緣

憶少子

端也早豐下歲晚未可量我老不自食安得如我
長呱呱棄不子退省未始忘吾母亦念我與爾寧
相望

絕句

翼翼陳州門萬里遷入道昔人死別處一笑欲絕
倒

寄外舅郭大夫

文人魯諸生。明刑如臯陶。幸寬右顧憂。未惜一身
遙西南萬里行。可以斷繩橋。慎勿冠惠文。神母仁
如堯。

二蘇公

岷峨之山中。巴江桂椒枏。櫨楓柞樟。青金黃玉丹
砂良獸皮鳥羽。不足當異人間。出駭四方巖。王陳
李司馬揚一翁。二季對相望。奇寶橫道驥。服箱誰
其識者有歐陽。大科異等固其常。小却盛之白玉
堂。典謨雅頌用所長。度越周漢登虞唐。千載之下
有素王。平陳鄭毛視荒荒。後生不作諸老亡。文體

變化未可量。萬口一律如吃羗。妖狐幻人大陸梁。
虎豹却走逢牛羊。上帝惠顧被不祥。天門夜下龍
虎章。前驅吳回後炎皇。絳旂丹轂朱冠裳。從以甲
冑萬鬼行。乘風縱燎無留藏。天高地下日月光。授
公以柄扶病傷。士如稻苗待公秧。臨流不度公為
航。如大醫王治膏肓。外證已解中尚強。探囊一試
黃昏湯。一洗十年新學腸。老生塞口不敢嘗。向來
狂殺今尚狂。請公別試囊中方。

南豐先生挽詞二首

早棄人間事。真從地下游。丘原無起日。江漢有東
流。身世從遠裏。功言取次休。不應須禮樂。始作後

程仇

又

精爽回長夜衣冠出廣庭
勳庸留琬琰形像付丹青
道喪餘篇翰人亡更典刑
侯芭才一足白首太玄經

暑雨

密雨吹不斷貧居常閉門
東溟容有限西極更能存
東濕炊懸釜翻床補壞垣
倒身無著處呵手不成溫

送江楚州

濠梁初得意闕里舊論詩
晚歲何多難經年始一

辭淮入飢饉後良吏拊循時
欲託山陽簿翁歸不受私

送江端禮

正學元非世能詩新有聲
諸公文鄭泰多士閉何生
沉愛經過數移書底裏傾
又為淮海別病眼向誰明

晁無咎張文潛見過

白社雙林去高軒二妙來
排門衝鳥雀揮壁帶塵埃
不憚除堂費深愁載酒回
功名付公等歸路在蓬萊

次韻荅邢居實二首

漢庭用少公何在，不使羣飛接羽翰。今代貴人須
白髮，掛冠高處未宜彈。

又

秋來為客意何如，千里河山信不踈。昔日老人今
則少，不妨紅葉閉門書。

丞相溫公挽詞三首

恭默思良弼，詩書正百工。事多違謝傅，天遽奪揚
公。一代風流盡，三師禮數崇。若無天下議，美惡併
成空。

又

百姓歸周老，三年待魯儒。時方隨日化，身已要人

扶。玉几雖來晚，明堂訖授圖。心知死諸葛，終不羨
曹蜎。

又

少學真成已，中年託著書。輟耕扶日月，起廢極吹
噓。得志寧論晚，成功不顧餘。一為天下慟，不敢愛
吾廬。

次韻荅學者四首

津爽氣貫眉目，十五男兒萬里身。筆下倒傾三
峽水，曾中別作一家春。

又

黃塵投老得何郎，唯擬明年共我長。熏沐不為杯

酒污飛揚未許老夫量

又

暗中摸索不難知，眼裏輪困却見稀。行地徑須先
八駿刺天終不羨羣飛。

又

太阿無前鋒不缺鉞，刀不堪供一切至柔繞指剛。
則折善而蔽之光奪月。

次韻秦觀聽鷄聞鴈二首

行斷哀多影不留，有人中夜攬衣裘。筆頭細字真
堪恨，眼裏長檠不解愁。

又

立馬塔除待一鳴，何如春夢不聞聲。固知鷄口羞
牛後，不待鳴羣已可驚。

嘲秦觀

長缺歸來夜帳空，衡陽回鴈耳偏聰。若為借與春
風看，無限珠璣咳唾中。

和豫章公黃梅二首

寒裏一枝春，白間千點黃。道人不好色，行處若為
香。

又

色輕花更艷，體弱香自永。玉質金作裳，山明風弄
影。

任本才三

答張文潛

我貧無一錐所向皆四壁瀛洲足風露胡不減飢
色昔聞杜氏子剪髻事尊客君歸定應賢三椀奉
巾櫛

九日寄秦觀

自是已下任別佳本之九才三

疾風回雨水明露步叢祠欲莫鷗九日清樽欺
白髮十年為客負黃花登高懷遠心如向老逢
辰意有加淮海少年天下士可能無地落烏紗

臣野

餘力唐虞後沉人海岱西不應容桀黠寧復有青
齊燈火魚成市帆檣藕帶泥十年塵霧底瞥眼怪

鳧鷖

示三子

去遠即相忘歸近不可忍兒女已在眼眉目略不
省極喜不得語淚盡方一晒了知不是夢忽忽心
未穩

烏呼行

去年米賤家賜粟百萬官倉不餘掬青錢隨賜費
追呼昔日剗瘡今補肉今年夏旱秋水生江淮轉
粟千里行不應遠水救近渴空倉四壁雀不鳴似
聞為政不為費兩不相侵兩相濟十年歛積用一
朝驚濤破山風動地

秋懷示黃預

忽鳴風歷耳道壞草侵衣月到千家靜林昏一鳥
歸冥冥塵外趣稍稍眼中稀送老須公等秋碁未
解圍

送張支使

曠度逢知晚高才處下難清秋一鷄上拭目萬人
看白酒初同醉黃花已戒寒憑將衰老事一一報
長安

送杜侍御純陝西轉運

餽糧千里古無策木牛流馬功不極邊頭數米換
黃金將軍汗馬未伏櫪黠羗人面作胡語鳥鼠貪

生爾如許熊虎可避蟲可驅覆巢熏穴意何如漢
虜相當庸可盡聊城正用一封書巧手莫為無麵
餅誰能留渴須遠井國家有急君得辭徐人不勞
扣闕請隴上壯士莫捫舌河西狂王防係頸向來
此地幾送迎草間翁仲口不瘡十年兩熟飽可待
一歲四守人何心老稚持車車不留歸人不行行
轉頭關中正須蕭丞相省內早要富民侯

送楊侍禁兼寄顏黃二公二首

相逢今已晚同府尚經年衆口不成虎諸公更薦
賢兩親須薄祿一障欲乘邊往問顏夫子何妨試
着鞭

又

多問黃居士終年欠一書因人候消息有使報何
如向晚逢揚子真堪託後車親年方賴祿不惜借
吹噓

送外舅郭大夫夔路提刑

天險連三峽官曹擬上游百年雙鬢白萬里一身
浮可使人無訟寧須意外憂平生晏平仲能費幾
狐裘

雪後黃樓寄負山居士

林廬煙不起城郭歲將窮雲日明松雪溪山進晚
風人行圖畫裏鳥度醉吟中不盡山陰興天留憶

戴公

謝人寄酒

舊香餘味記黃封厭見春泥滿眼紅千乘莫從公
子後百壺能為故人東

從蘇公登後樓

倏作三年別才堪一解頰樓孤帶清洛林缺見巴
山五月池無水千年鶴自還白鷗沒浩蕩愛惜鬢
毛斑

送蘇公知杭州

平生羊荊州追送不作遠豈不畏簡書放麕誠不
忍一代不數人百年能幾見昔如馬口銜今為禁

門鍵一雨五月涼中宵大江滿風帆目力短江空
歲年晚

送秦觀二首

士有從師樂諸兒却未知欲行天下獨信有俗間
疑秋入川原秀風連鼓角悲目前狔犬類未必慰
親思

又

師法時難得親年富有餘端為李君御盡讀鄴侯
書結友真莫逆論才有不如折腰終不補可但曳
長裾

和江秀才獻花三首

風雨東籬冷落看清溪水落玉峯寒酒家不辨當
壚費乞與先生種杏壇

又

疎花得雨數枝黃白髮緣愁百尺長要與老生同
一醉故留秋意作重陽

又

江公孤憤不宜秋吟作秋虫到白頭過我可為千
日醉從公難作百錢游

次韻李節推九日登南山

平林廣野騎臺荒山寺鳴鐘報夕陽人事自生今
日意寒花只作去年香巾歌更覺霜侵鬢語妙何

妨石作腸。落木無邊。江不盡。此身此日更須忙。

別負山居士

田園相與老。此別意如何。更病可無酒。猶寒已自和。高名胡未廣。詩興尚能多。沙草東山路。猶須一再過。

送趙教授

東髮相看到白頭。了知公鬢不勝憂。可堪親老須三釜。又著儒冠忍一羞。平世功名須晚節。向來旬月取封侯。北州豪傑知誰健。乞我黃淤十里秋。

次韻春懷

欲作歸田計。無如二頃何。折腰方賴祿。拭面未傷

和日下鳥聲樂。塵生鳥跡多。渡頭留小楫。乘興得相過。

黃梅五首

異色深宜晚。生香故觸人。不施千點白。別作一家春。

又

舊鬢千絲白。新梅百葉黃。留花如有待。迷國更須香。

又

冉冉稍頭綠。婷婷花下人。欲傳千里信。暗折一枝春。

又
黃裏含真意春容帶薄寒欲知誰稱面徧挿一枝
看

又
花裏重重葉釵頭點點黃
祗應報春信故作香人

田家

鷄鳴入當行犬鳴入當歸秋來公事急出處不待
時昨夜三尺雨竈下已生泥人言田家樂爾苦人
得知

巨野二首

紅落芙蓉晚青深蒲稗秋平湖無過鳥鳴鼓有行
舟

又

蒲港侵衣綠蓮塘亂眼紅將身供世事結纜待回
風

別叔父錄曹

為吏專文法成家託弟昆三年如昨日一笑更何
言扶老須微祿移官實至恩兩踈元父子何日復
東轅

出清口

家世山東飽耕稼晚託一舟順流下漁溝寒餅不

下筋推拖轉頭更五夜平明放溜出清口霜落潮
回霧連野平淮一夢三十里有日無風神所借似
憐憂患滿人間百孔千瘡容一罅文章末技將自
効語不驚人神可嚇子女玉帛君所餘寄聲白鳥
煩多謝

泛淮

冬暖仍初日潮回更下風鳥飛雲水裏人語槽聲
中平野容回顧無山會有終倚檣聊自逸吟嘯不
須工

猴馬有序

楚州紫極宮有畫沐猴振索以戲馬頓索

以驚圍人不測從後鞭之人言沐猴宜馬

而今為累作詩以導馬意

韓鄂四時纂要
曰常繫獼猴於

馬坊內辟惡省百
病令馬不着疥

沐猴自戲馬自驚圍人未解猴馬情猴其天資馬
何罪意欲防患猶傷生異類相宜亦相失同類相
傷非所及志行萬里困一誤吐豆齧芟甘伏櫪

徐氏閑軒

倦游梁楚愛吾廬老寄山林孰與娛想見杖藜臨
過鳥更能赤手縛於菟君寧平世輕三釜我亦東
原有一區擬買婣娟作歸計可無堆玉斗量珠

寄豫章公三首

密

密雲不雨卧烏龍已足人間第一功得諾向來輕
季子打門何日走周公

又

愧無一縷破雙團憤下薑薑在肺肝擔酒不應忘
此老論詩寧肯乞麗官

又

人須百斛買雙鬢水截龍章試虎斑老覺才疎渾
不稱自携雲月瀉潺湲

贈秦觀

兩秦並立難為下萬里長驅在此初別後未忘三
日語人來肯作數行書

丹

又

文章從古不同時詩語驚人筆益奇過與阿平應
絕倒世間能有幾人知

次韻秦少游春江秋野圖

翰墨功名裏江山富貴人候看雙鳥下已負百年
身

又

江清風偃木霜落鴈橫空若箇舟青裏猶須著此
翁

幼嶺

外家英俊場季氏不好弄用意丘壑間頗以石自

奉誰言拳握間意作萬牛重岱宗小天下不辦一
席用

絕句

斫水水可斷續弦弦可完如何鄭公客不作百年
看

贈歐陽叔弼

早知汝穎多能事晚以詩書託下僚大府禮容寬
懶慢故家文物尚嫖姚只將憂患供談笑敢望功
言答聖朝歲歷四三仍此地家餘五一見今朝

後山先生集卷第一

後山先生集卷第二

詩

觀文忠公家六一堂圖書

已下作別本三卷

生世何用早我已後此翁頗識門下士略已聞其
風中年見二子已復歲一終呼我過其廬所得非
所蒙先朝羣玉殿冠佩環羣公神文煥王度喜色
見天容御榻誰復登帝書元自工黃絹兩大字一
覽涕無從似欲託其子天意人與同歷數况有歸
敢有貪天功集古一千卷明明並羣雄誰為第一
手未有百世公廟器刻科斗寶樽蟠華蟲緬懷弁
服士酬獻鳴琤瑤挿架一萬軸遺子以固窮素琴

久絕弦。棊酒頗闕供。向來一瓣香。敬為曾南豐。世
雖嫡孫行。名在惡子中。斯人日已遠。千歲幸一逢。
吾老不可待。露草濕寒蒼。

送蘇迨

曾中歷歷著千年。筆下源源赴百川。真字飄揚今
有種。清談絕倒古無傳。出塵解悟多為路。隨世功
名小。耆鞭白首相逢恐無日。幾時書札到林泉。

送黃生兼寄二謝

南第諸兄蚤相見。別時託子以無倦。百年論交見
子心。一朝取別寧吾願。妙歲遠遊真所難。肯為得
官近長安。聖作詩書端有意。猶須用心料舉外。

又

城西兩謝俱能文。穰丞精悍吾所聞。每讀吾詩得
人意。使不能文已可人。我昔謝公門下士。早年妄
作功名意。如今老寄潁河東。九泉雖深思此公。

次韻蘇公西湖徙魚三首

窮秋積雨不破塊。霜落西湖露沙背。大魚泥蟠小
魚樂。高丘覆杯水如帶。魚窮不作搖尾憐。公寧忍
口不忍鱠。脩鱗失水玉參差。晚日搖光金破碎。咫
尺波濤有生死。安知平陸無灘瀨。此身寧供刀几
用。著意更須風雨外。是問相忘不為小。濠上之意
誰得會。枯魚雖泣悔可及。莫待西江與東海。

又

赤手取魚如拾塊。布網鳴舷。攻腹背。豈知激濁與
清流。恐懼駢頭牽翠帶。居士仁心到魚鳥。會有微
生化。餘鱸寧容網目漏。吞舟誰能烹鮮作。奇碎我
亦江湖釣竿手。悞逐輕車從下瀨。生當得意落鷗
邊。何用封侯隨鷺外。不如此魚今得所。置身暗與
神明會。徑須作記戒鯨鯢。防有任公釣東海。

又

詩成落筆驥歷塊。不用安西題紙背。小家厚劔四
壁立。拆東補西裳作帶。堂下轂鯨牛何罪。太山之
陽人作鱸。同生異趣有如此。餅懸甕間終一碎。流

水長者今公是。雨花散亂投金瀨。人言充庖湏此
輩。慈觀更湏容度外。賜墻及有人得視。公才槃槃
一都會。有憐其窮與不朽。我亦牽聯書玉海。

次韻蘇公西湖觀月聽琴并涉穎二首

清湖納明月。遠覽無留雲。人生亦何湏。有酒與桐
君。自醉寧問客。一盃復一盃。平生今不飲。意得同
酣醺。清言冰玉質。壞衲山水紋。殫精有後悟。畜耳
無前聞。潛魚避流光。歸鳥投重昏。信有千丈清。不
如一尺渾。衝風不成寒。脫木還自竒。坐看白日晚。
起行清潁湄。三穴未為得一舟。不作癡路暗鳥遺
音。江清魚弄姿。宇定恠物變。意行覺舟遲。公與兩

公子妙語含風漪。但怪笑談劇莫知。賓主誰得句
未肯吐。鬱鬱見睫眉。相從能幾何。行樂當及茲。生
忍自作難。百憂間一嬉。時尋赤眼老。不探黃口兒。
解公頭上巾。一洗七年緇。至潔而納污。此水真吾
師。須公曉二子。人自窮非詩。

再次韻蘇公示兩歐陽

公詩周魯後。曳曳垂天雲。府中顧長康。風味如麴
君。非公無此客。請壽南山樽。叔季大儒後。偏醒亦
同醺。心與栢石堅。章成綺繡紋。多難獨不補。少戇
今無聞。時無古今異。智有功名昏。可使百尺底。不
作數斗渾。

次韻蘇公勸酒與詩

五士三不同。煩公以詩訴。強酒古所辭。妙語神其
吐。自念每累人。舉扇無我污。復使兩歐陽。縮手不
分付。平生西方社。努力須自度。不憂龜九頭。肯為
語一誤。頓悟而漸脩。從此辭世故。公看萬金產。寧
能一朝具。兩生文章家。夙紀鳴蟬賦。請公堅城壘
兵。央後無數。

次韻蘇公督兩歐陽詩

吟聲正可候。蟲鳴酒面猶。須作老兵。豈有文章妨
要務。孰知詩律自前生。向來懷璧真成罪。未必含
光不屢驚。血指汗顏終縮手。此懷端復向誰傾。

次韻蘇公題歐陽叔弼息齋

行者悲故里，居者愛吾廬。生須著錫地，何賴汗牛
書。丈室八尺床，稱子閉門居。百為會有還，一足不
願餘。紛紛幼老間，失得了玄虛。客在醉則眠，聽我
莫問渠。論勝已絕倒，句妙方愁予。竹几無留塵，霜
畦有餘蔬。相從十五年，不為食有魚。時須一俛仰，
君可貸蘧蔭。

次韻蘇公竹間亭絕句

竹裏高亭燈燭光，今年復得杜襄陽。候看老蓋千
年後，更想霜林百尺強。

寄參寥

平生西方願，擺落區中緣。惟於世外人，相從可忘
年。道人贊公徒，相識幾生前。早作步兵語，晚參雲
門禪。拾策孤山下，一室頗蕭然。林昏出幽磬，竹杪
橫疎煙。昨日寄書至，坐想參寥泉。此泉如此公，遇
物作清妍。一別今幾時，綠首成白顛。子亦憐我老，
我豈要子憐。會逢萬里風，一繫五湖船。酌我巖下
水，咽子山中篇。

北渚

南蕩不可度，北渚風浪生。向來狐兔迹，已復蛟鼉
鳴。

東禪

東阡急雨不成泥，度密穿青取藻微。邂逅無人成
獨往，慙慙有月與同歸。

八月十日二首

一夢人間四十年，只應炊竈固依然。兩官不辦一
丘費，五字虛隨萬里船。

又

人生七十今強半，老去光陰已後身。更欲置身須
世外，世間元自不關人。

迎新將至漕城

早投林野遠風雨，晚傍塵沙飽送迎。却愧兩街屠
販子，卧聽車馬過橋聲。

即事

老覺山林可避人，正須麋鹿與同羣。却嫌鳥語猶
多事，強管陰晴報客聞。

齋居

青奴白牯靜相宜，老罷形骸不自持。一枕兩窓深
閉閤，卧聽叢竹雨來時。

中秋夜東刹贈仁公

盈盈秋月不餘分，葉露懸光可數塵。此地正須煩
一笑，要令排戶問東隣。

十五夜月

向老逢清節，歸懷託素暉。飛螢元失照，重露已霑

衣稍稍孤光動。沉沉萬籟微。不應明白髮。似欲勸人歸。

胡士彥挽詞二首

晚進遠前輩。平生闕異聞。吾猶識此老。天豈喪斯文。善學家傳業。英詞世不羣。固應譏尚白。官序見揚雲。

楊子雲也

又

此地來何晚。經年見未頻。薦賢仍賭命。有道可辭貧。徒弟三千子。聲名四十春。襄陽耆舊內。無復姓龐人。

後山先生集卷之二

後山先生集卷第三

詩

送趙承議

已下任別本四卷

先生隱德世難名。晚見諸孫也自成。潁水向來須好句。道山今日有宗英。林湖更覺追隨盡。巾帽猶堪語笑傾。勤苦讀書終不補。未須墻角棄長檠。

寄李學士

眼看游舊半東都。五歲曾無一紙書。平日齊名多早達。莫年同國未情踈。稍尋東剡論茲事。賴有西方託後車。說與杜郎須著便。不應濠上始知魚雪。

初雪已覆地。晚風仍積威。木鳴端自語。鳥起不成
飛。寒巷聞驚犬。鄰家有夜歸。不無慙敗絮。未易泣
牛衣。

晚出

應俗敢辭疾。衝風寧小驅。聊為一日役。不憚百金
軀。雪路無行迹。冰枝有落烏。寒門閉蕭瑟。窮里聽
戲吁。

寄晁載之兄弟

人言婚宦情欲本。我始求脫君已半。孰知一世如
一夢。在夢而覺寧待旦。寒簷凍雨作秋聲。冷屋風
燈挑不明。樽前已作十年語。後會未期吾屢驚。

一聞七字心已識。鉤章棘句天與力。念子方壯我
已衰。不見參天二千尺。季也亦有詩百篇。叔子擬
度驂騑前端能過我。三冬學可復參儂。一味禪

寄荅王直方

人情校往復。屢勉終不近。新詩已經年。知子不我
怨。生世餘幾何。尺箒日取寸。懷祿有遐心。徒俗無
遠韻。時從府中歸。數過林下飯。平生功名意。回作
香火願。三年不舉觴。吻頻烟火煖。豈無兩蒼龍。露
我一雨潤。官麓詩未工。猛乞無小靳。人生如此耳。
文字已其閏。是身雖臭腐。寧作青紫檀。永懷忘年
友。死矣餘令聞。念子頗似之。老我何所恨。

寄侍讀蘇尚書

六月西湖早得秋，二年歸思與遲留。一時賓客餘
枚叟，在處兒童說細侯。經國向來須老手，有懷何
必到壺頭。遙知丹地開黃卷，解記清波沒白鷗。

寄亳州林待制

湖海相望闕寄聲，雲林過雨未全晴。青衫作吏非
前日，白首論文笑後生。似聽兒童迎五馬，稍脩書
札問專城。一聞苦李蒙莊句，不復人間世後名。

卧疾絕句

老裏何堪病再來，愁邊不復酒相開。一生也作千
年調，兩脚猶須萬里回。

南軒絕句

少日書林頗著勲，莫年貪佛替論文。銅鑪瓦枕芒
鞋裏，此外惟須對此君。

獨坐

文章平日事風竹，暮年須衰疾懸知。此霜毛不更
除一丘，吾欲往百畝。有如無鷗魅，須游子乾坤著
腐儒。門聞啄木勸酒有提壺，門逕無行迹。秋來
不遣鋤。

寄送定州蘇尚書

初聞簡策侍前旒，又見衣冠送作州。北府時清惟
可飲，西山氣爽更宜秋。功名不朽聊通袖，海道無

遠具一舟在讀平生三萬卷貂蟬當復自兜鍪

寄荅李方叔

平生經世策寄食不資身孰使文章著能辭轍跡
頻城分不入書札詞何人子未知吾懶吾寧覺
子貧

智寶院後樓懷胡元茂

晚渡呼舟疾寒城暮霧深昏鷗明鳥道風葉亂霜
林久客登樓目中年懷舊心猶須一長笛領覽自
霑襟

元日

老境難為節寒稍未得春一官無利害百慮孰踈

親積雪無歸路扶行有醉人望鄉仍受歲回首望
松筠

放懷

施食烏鳶喜持經鳥鼠聽杖藜矜矍鑠顧影怪伶
俚間靜行隨月窓虛卧見星擁衾眠未穩艱阻能
曾經

絕句

平生精力盡於詩末歲心存力已疲不共盧王爭
出手指却思陶謝與同時

送伯兄赴吏部改官

先子初增秩年侵鬢已皤念兄今善繼此別喜如

何親老家仍困門衰仕未多猶須教兒子早要中
文科

寄張文潛

今代張平子雄深次子長名高三俊上官立右螭
傍車笠吾何恨飛騰子莫量時平身早達未用夢
凝香

後湖晚坐

水靜靜一作半偏明眼城荒可當山青林無限意白鳥
有餘閑身致江湖上名成伯季間目隨歸鴈盡坐
待莫鷗還

春興

東風作惡不成寒野水穿沙自作灘細草無端留
客卧繁枝有意待人看

次韻回山人贈沈東老二首

一杯領意不須沽六字持身已有餘癡子未知天
上樂先生今解世間書

後篇屬沈東老

隨世功名非所望稱家豐儉不求餘青衫出指論
奇字白髮挑燈寫細書

送孝忠二首

老眼元多淚春風見此行又為貧賤別更覺急難
情斗食吾堪老詞場爾向榮未須憐野鷺家法付

宣城

又

經史三年學聰明一旦開把文甘潦倒數日待歸
來士患聲名早官今歲月催有親須薄祿臨路尚
徘徊

以桂桂一作桂杖供仁山主二首

錯節孤根勁有餘坐床須按起須扶一生用底今
相贈更問林間有此無

又

洗足投筇只坐禪厭尋岐路費行纏老來不復入
間事不用山公更削圓

項城道中寄劉令使修溪橋

老怯危橋泥沒膝喜聞吾黨政如春須君不惜千
金費此後寧無我輩人

碓磨寨

以人為食殺為戲自昔無聞爾所先信有亡身一
言盡獨能遺臭萬人傳

寄張宣州

與世情將盡懷仁老未忘故人今五馬高處謾三
長詩豈江山助名成沈鮑行肯為文俗事打鴨起
鴛鴦

送倫化主

赤髭白足可憐生躡蹻擔囊壯此行要致雪峯千
五百不妨無識謝宣城

西湖

小徑才容足寒花只自香官池下鳧鴈荒塚上牛
羊有子吾甘老無家去未量三年哦五字草木借
輝光

別月華嚴

寓世生同里隨方去有情來為百年別不惜片時
程齋鉢須勤供經鍾莫倦鳴當來第三會此界却
逢迎

送吳先生謁惠州蘇副使

聞名欣識面異好有同功我亦慙吾子人誰恕此
公百年雙白鬢萬里一秋風為說任安在依然一
禿翁

別圓澄禪師

法施老人卧不出呼我取別行問疾磨盤拭筋勸
一飽少待須臾莫倉卒早年耆眼覩文字萬卷初
無一言契多生綺語未經讖半世虛名足為累此
去他來尚有緣頭童齒豁恐無年慙懃三請久住
世弊惡可念未可捐平生唯擬西行計老著人間
此何意他年佛會見頭陀知是當年老居士

別觀音山主

離合應生理。過逢豈近緣。情親見今日。語妙記當年。
閉戶安禪主。衝風逆水船。不應清夜月。故作別時圓。

離頌

河市千人聚。寒江百尺牽。吾生能幾日。此地費三年。
叢竹防供爨。池魚已割鮮。拙勤終不補。他日愧無傳。

湖上

湖上難為別。梅梢已著春。林喧鳥啄啄。風過水鱗鱗。
緣有三年盡。情無一日親。白頭厭奔走。何地與為鄰。

舟中二首

惡風橫江江卷浪。黃流湍猛風用壯。疾如萬騎千里來。
氣壓三江五湖上。岸上空荒火夜明。舟中起坐待殘更。
少年行路今頭白。不盡還家去國情。

又

野火燒原雉昏。雖黃塵漲天牛亂。鬪江間無日不風波。
老去何時脫奔走。詩書滿腹不及口。遮日寧須釣竿手。
愧爾茅簷多背人。仰目青天搔白首。

規禪停雲齋

淨居衆天人。宮殿隨所適。少仕老不歸。重門閉榛棘。
道人秀叢林。妙語出禪寂。是身如浮雲。隨處同

建立平生與二子嗜好同一律我此復助緣語綺
已多責何年一把茅擬坐孤翠峯呵佛罵祖師塗
糊千五百

荅晁以道

已下任測本五卷

轉走東南復帝城故人相見眼偏明十年作吏仍
餬口兩地為鄰闕寄聲冷眼尚堪看細字白頭寧
復要時名孰知范叔寒如此未覺巖公有故情

病起

今日秋風裏何鄉一病翁力微須杖起心在與誰
同災疾資千悟冤親併一空百年先得老三敗未
為窮

九月九日魏衍見過

節裏能相過談間可解憂致踈君未肯得此我何
由語到君房妙詩同客子游一經從白首萬里有
封侯

別黃徐州

姓名曾落薦書中刻畫無益自不工一日虛聲滿
天下十年從事得途窮白頭未覺功名晚青眼常
蒙今昔同衰疾又為今日別數行老淚灑西風
次韻荅晁無斁

女生願有家名妾以不聘由里亦慕君又惡不由
正欲行不問途已破寧顧甌耕蠶無一塵庖井要

三徑還家憂患餘。挽鬚兒女競。十年寧有此。一寒可無命。平生晁夫子。得士公室慶。稍無車馬音。復作賓客請。論文到韓李。念舊說蘇鄭。長年斷消息。獨語誰和應。此生恩未報。他日目不瞑。歸卧無好懷。扣門有佳聽。詩來霜雪後。更覺天宇淨。少好老未工。持刃授子柄。

次韻無斁偶作

肩聳三峯峻。眉厖八字橫。玄談人絕倒。家法句新清。八俊先張子。諸公少賈生。已傳烏鵲喜。欲聽鶴鳴聲。

其二

此老三年別。何時萬里回。更無南去鴈。猶見北枝梅。會有哀籠鳥。寧須溺死灰。聖朝無棄物。與子賦歸哉。

古墨行

并序

晁無斁有李墨半丸云。永裕陵故物也。往於秦少游家。見李墨不為文理。質如金石。亦裕陵所賜。王平甫所藏者。潘谷見之。再拜云。真廷珪所作也。世惟王四學士有之。與此為二矣。嗟乎。世不乏奇。乏識者耳。敬為長句。率無斁同作。秦郎百好俱第一。烏鳥一丸墨如漆。姿如石。巧作松身。與鏡面。借羨於外。非良質。潘翁拜跪。摩老眼。一

生再見三歎息了知至鑒無遁形王家舊物秦家
得君今所有亦其亞伯仲小低猶子姪黃金白壁
孰不有古錦句囊聊可敵睿思殿裏春夜半燈火
闌殘歌舞散自書細字答邊臣萬里風塵入長筭
初聞橋山送弓劍寧知玉盃人間見夜光炎炎衝
斗牛會有太史占星變人生尤物不必有時一過
目驚老醜念子何忍遽磨研少待須臾圖不朽魏
注曰少游之墨嘗許先生為它日墓誌潤筆先
生嘗語術作此詩時少游尚無恙然終先逝去明
窓淨几風日暖有愁萬斛才八斗徑須脫帽管城
公小試玉堂揮翰手

次韻晁無斁除日述懷

世學遠從衆名家最近天感時猶壯志得句起衰
年表酒無何飲陶琴不具弦平生揮翰手幾見絕
韋編

次韻無斁雪後

閉閣春雲薄開門夜雪深江梅猶故意湖鴈起歸
心草潤留餘澤窓明度積陰慙慙報春信屋角有
來禽

其二

取性無通介隨時有異同雪餘蓋地白春淺着梢
紅寄食虛長筭魏衍注云時先生寄歸翁郭大
夫曹州使宅晁時為州教官論
詩闕近功相看不相棄賴有古人風

贈魏衍三首

妙年文墨秀儒林，老眼今晨得再明。
歷塊過都聊可待，未須回首一長鳴。
崔蔡論文不足過，新詩平處到陰何。
寧須萬戶權輕重，不待千篇一已多。
敏捷為文筆不休，何妨縮手小遲留。
名駒已自思千里，老子終當讓一頭。

贈國寶三首

承家從昔如君少，得士於今孰我先。
口擬說詩心已解，世間快馬不須鞭。

往歲黃童

黃預

今寇君高文要學亦多聞，留年看舉

天南翼過目先空冀北羣

虎子墮地氣食牛，雀兒浴處魚何求。
可柰我衰才亦盡，正須二子與同游。

次韻春懷

老形已具臂膝痛，春事無多櫻笋來。
敗絮不温生蟣蝨，大杯覆酒著塵埃。
衰年此日常為客，舊國當時只廢臺。
河嶺尚堪供極目，少年為句未須哀。

河上

背水連漁屋，橫河架石梁。
窺巢烏鵲競，過雨艾蒿光。
鳥語催春事，窓明報夕陽。
還家慰兒女，歸路不應長。

題柱 并序

永安驛廊東柱有女子題五字云無人解妾心
日夜長如醉妾不是瓊奴意與瓊奴類讀而哀
之作二絕句

桃李催殘風雨春。天孫河鼓隔天津。主恩不與妍
華盡。何限人間失意人。

從昔嬋娟多命薄。如今歌舞更能詩。孰如如一文
雅河陽冷。不削瓊奴柱下題。

蠅虎

物微趣下世。不數隨力捕。生得稱虎。匿形注目。搖
兩股。卒然一擊。勢莫禦。十中失一八九取。吻間流

血腹如鼓。却行奮臂。吾甚武。明日淮南作端午。

陶朱公廟

千篇奏牘。漫多知。百戰收功。未出奇。名下難居身
可辱。却將湖海換西施。

次韻晁無斁夏雨

咫尺隔山海。作書問如何。蟻垤既畜糧。蛙窟如鳴
鼉。積暑復一雨。斧斫仍手摩。鉤窓欲懸麻。出門已
橫河。人言月離畢。未必致滂沱。東臯繁草木。蘭艾
不同科。驚魚畏密罟。獨鳥鳴南柯。稍無蟲飛喧。復
覺蟬語多。因聲作好惡。與物殊未和。卧聞夜來雨。
歸種故山禾。百年須下澤。萬里付長羅。先生斷百

好尚以詩作魔縮子萬言手聽渠七字哦室邇人
則遠燕默勞者歌思君得老瘦觸熱生積疴

寄無斁

敬問晁夫子宫池幾許深已應飛鳥下復作卧龍
吟待我中疴愈同君把臂臨泥塗無去馬夏木自
來禽

次韻別張芸叟

中年為別更堪頻四海為家託一身此別時須問
生死孰知詩力解窮人

宿深明閣

窈窕深明閣晴寒是去年老將災疾至人與歲時

遷默坐元如在孤燈共不眠莫年身萬里賴有故
人憐

其二

縹緲金華伯人間第一人劇談連晝夜應俗費精
神時要平安報反愁消息真墻根霜下草又作一
番新

東山謁外大父墓

土山宛轉屈蒼龍下有槃槃蓋世翁萬木刺天元
自直叢篁侵道更須東百年富貴今誰見一代功
名託至公少日拊頭斯類我莫年垂淚向西風
次韻晁無斁冬夜見寄

寒窓冷硯欲生塵。短枕長衾却自親。老子形骸從
薄暮。先生意氣尚青春。覆杯不待回丹頰。危坐猶
能作直身。城郭山林兩無得。莫年當復幾霑巾。

寒夜有懷晁無斁

同好共城郭。十日不一顧。人事雖好乖。吾生亦多
忤。闔門對妻子。歲月不可度。閉目寧用遮。停杯仍
下筯。獨無區中緣。永懷岩下趣。平生三徑資。安得
一朝具。萬里初歷塊。前驅告曛暮。歸懷屬有思。棄
世不待怒。老境厭逶遲。人情費將護。向來張長公。
吾亦從茲去。燈花頻作喜。月色正可步。預恐何水
曹。明朝有新句。

除夜

七十已強半。所餘能幾何。懸知莫景促。更覺後生
多。遁世名為累。留年睡作魔。西歸端著便。老子不
婆婆。

寄鄧州杜侍郎

蘇

已下任開本六卷

南陽老幼如雲屯。連日城東候使君。後者排前旁
捷出。爭先見面作慇懃。六年重來已白髮。一日再
見回青春。道傍過者恠相問。共言杜母真吾親。使
君雖老心尚壯。文采風流諸謝上。名家從昔杜陵
人。盛德于今丈人行。我昔卧病老彭城。畫船鳴鼓
千里行。致書饋奠初未識。丁寧勞苦如平生。人言

此事今未有古人中求還得否忘年屈勢不虛辱
公自一作自為德吾何取菊潭之水甘且潔潭上秋
花照山白請公酌此壽百年奕奕長為此邦伯孰
先一州後四方重金疊蓋登廟堂請從今日至雲
來月三十斛輸洛陽

寄提刑李學士

石渠金馬青雲上東里西門濟水邊上冢過家真
樂事平時持節貴當年成家舊學諸儒問脫手新
詩萬口傳范叔一寒今若此相逢猶得故人憐

寄杜擇之

杜寄惠
近詩

詩家兩杜昔無鄰文采風流一作傳家世有人疾置送

詩驚老醜坐曹得句自清新興來不做江山助目
過渾如草木春農馬智專吾不讓衡陽紙貴子能
頻

次韻晁無斁春懷

城郭朝陽散積陰郊原注目日青深年衰鷗鷺如
今是夢斷邯鄲何處尋語鵲飛鳥春稍稍重簾深
院晚沉沉不辭杖屨衝泥雪未有瓊琚報好音

寄晁無斁

稍聽春鳥語丁寧又見官池出斷冰雪後踏青誰
與共花間耆語老猶能笑談莫倦尋常聽山院終
同一再登今日已知他日恨捨榆况得及飛騰

別寶講主

此地相逢晚。他方有勝緣。呪功先服猛。戒力得扶
顛。暫息三支論。重參二祖禪。趙州臨濟皆曹人也夜牀鞋脚
別何日著行纏。

還里

曠士鄉吾廬。遊子悲故鄉。慷慨四方志。老衰但悲
傷。虛名自成誤。失得略相當。莫年還家樂。未覺道
路長。問里喜我來。車馬塞康莊。爭前借言色。草木
亦晶光。向來千人聚。一老獨徜徉。手開南陽阡。松
栢鬱蒼蒼。永願守一丘。脆身萬里航。平生功名念
倒海。浣我腸。款段引下澤。斷弦更空觴。尚恐北山

南有文移路傍

答魏衍黃預勉余作詩

我詩淺短子貢墻。衆目俯視無留藏。句中有眼黃
別駕。洗滌煩熱生清涼。人言我語勝黃語。扶豎夜
燎齋。朝光三年不見萬里外。安得一身置汝傍。適
來諸子復秀發。曾未幾見加端章。刺欲摧藏讓頭
角。豈是有意羣兒傷。於人無怨我何憾。愛者尚衆
猶吾鄉。平生不自解嘲諷。禍來亦復非周防。我衰
氣索不自振。正賴好語能恢張。詩家小魏新有聲。
舊傳秀句西里黃。後生學行闕師友。臨路不進空
迴遑。看君事業青雲上。聽渠螟螣生膏肓。

老栢 并序

勝果院後庭有栢見之二十年矣踈瘦如故余寓其舍數以水漑之遂有生意

庭栢無生意摧殘二十秋稍霑杯水潤已與歲寒謀黃裏青青出愁邊稍稍瘳會看笙鶴下暮雀莫深投

其二

英姿帶枯槁勁節闕和柔物理有興壞人情成去留稍看棲鳥集聊待晚風秋斛道庭前栢何曾識

趙州

其三

歲月那能記風霜亦飽經槁乾仍故節潤澤出新青色與江波共聲留靜夜聽輝輝垂重露點點綴流螢

魏衍見過

暑雨不作涼爽風祗自高我老亦衰疾柰此正鬱陶魏侯有新語高處近風騷隱几聆五字未覺歷日勞灑然墮冰井起栗豎寒毛三山已在目萬象誰能逃歷險見絕足過口味豚膏願為夏雷鳴莫作飢鷲號

次韻螢火

年侵觀物化共被歲時催熠熠孤光動翩翩度水

來稍能穿幔入，已復受風回。投卷吾衰矣，微吟子壯哉。

次韻夏日江村

漏屋簷生菌，臨江樹作門。捲簾通燕子，織竹護鷄孫。
向夕微風一作涼進相逢，故意存。
汗一作需衣何當加我歲，從子問乾坤。

次韻觀月

風雲隨落日，河漢欲回天。隔巷如千里，還家已再圓。
簾疎分細細，江淨共娟娟。他日吾何適，聽詩說去年。

次韻夏日

江上雙峯一草堂，門開心靜自清涼。詩書發冢功名薄，麋鹿同羣歲月長。
句裏江山隨指顧，舌端幽眇致張皇。莫欺九尺鬚眉白，解醉佳人錦瑟傍。

夏夜有懷

卧念張居士，逃名老石根。學詩端得瘦，識字即空樽。
鳴笛夜宜遠，燈花曉更繁。未須哀老子，也復守丘園。

送杜擇之

兩父論詩伯仲間，去思今識謝家安。曠懷亦苦中年別，歸翼仍愁行路難。
四壁未堪風雨夕，百園已試雪霜寒。欲逃富貴疑無地，千丈竿頭試手看。

楊夫人挽詞

晁無咎母

初說南奔道路長，湖邊丹旆已飛揚。百年積慶鍾
連璧，十念收功到淨方。絳幔一作帳未經親宋母，綠
衣猶記識黃裳。欲圖不朽須詮載，今代誰堪著石
章。

桓山

平江如抱貫秦洪，雙嶺馳來欲並雄。是物皆為萬
世計，闔棺猶有一朝窮。林巒特起終有汗，羨惡千
年竟不空。尚有風流羊叔子，稍經湔洗與清風。
東有

坡記
刻石

答顏生

煩君臨問我何堪，剩欲從君十日談。老退不應稱
敏捷，顏蒼寧復借紅酣。世間公器無多取，句裏宗
風却飽叅。陋巷遠孫還好學，未容光祿擅東南。

送劉主簿

義仲字壯與

平生師友豫章公，矻矻談君口不空。半面相看吾
已了，連城增價子何窮。三千奏牘諸儒上，四百菴
寮一歲中。二父風流皆可繼，謗禪排道不須同。

觸目

溪響飢魚食，川明柱影斜。鷺禽穿密竹，噪鵲立浮
查。谷暗山藏雨，林喧雀啅蛇。細問等行路，何處一作
更為家。

晚望

黑雲映黃槐。更著白鳥度。蟬鳴不餘力。蛙腹能許怒。稱目有佳思。側徑無好步。興來成獨往。意得誰與賦。

送高推官

先生鍾舊德。大府冠羣能。過手無難事。逢人有異稱。薦賢餘一鶚。夙記契千燈。看挽秦梁纜。頭頭數不勝。

和黃預感秋

宿雲護朝霜。秋陽佐殘暑。蠅癡驅復來。汗下拭莫禦。庭梧自黃墮。風過成夜語。幸是可憐生。胡然遽

如許。黃生多新詩。如益

一作益

繭抽緒。唱高難款乃。

雋永得。咬咀意合無古今。投暗有迎拒。名成弟子

韓。價重先生楮。向來得斯人。孰謂予齟齬。晚炊鄰

僧米。晝捨狙公芋。甘酸皆適口。霜黃

一作盡

未登俎。

門有曲逆車。謗甚北山女。寧為溝中斷。不作太倉

鼠。老退無好懷。續明然兩炬。搔首不成眠。寒蟲促

機杼。

和顏生同遊南山

竹杖芒鞋取次行。琳琅觸目路人驚。當年此日仍為客。病目今來喜再明。筋力尚堪供是事。登臨那得總無情。已知名世徒為爾。可復緣渠太瘦生。

僧慧僧和同往南山
驥駮同羣鴻鴈行登臨端為作重陽南臺二謝風
流絕準擬歸來古錦囊

栢

用直寧論世名成不待官低枝綠我有偃蓋到誰
看秀色有新故英姿無暑寒要為千歲計豈慮萬
牛難

謝端硯

王家舊物羣偷後石出蠻溪百丈深揮翰吾非玉
堂手斷金君有古人心

捕狼

一狼將四子二嶺走千羊意得無前敵時乖闕後
防寧知射生手已發努機張會使烏鷲飽空令豺
虎傷

和魏衍元夜同登黃樓

車馬競清夜人物秀三楚登臨得免俗茲樓豈時
睹同來兩稚子寇者亦四五落落俱可人頗亦厭
歌鼓山月出未高潛鱗動寒渚檣燈接稀星奪目
繁不數魏侯轉物手百好趨就叙得句未肯吐秀
氣出眉宇水淨納行影山空答脩語夜氣稍侵肌
鳥駭去其侶清游豈有極喜事戒多取投靜未免
喧于今豈非古永懷寂寞人南北忘在所橫嶺限

魚鳥作書欲誰與情生文自哀意動足復佇憑楹
一作共一默望舒已侵午

和元夜

茄鼓喧燈市車輿避火城彭黃彭祖樓黃樓爭地勝汴

泗迫人清梅柳春猶淺關山月正一作自明賦詩隨

落筆端復可憐生

和魏衍同遊阻風

舊說東風末世情不應作意斷人行絕須一怒催
新句更可多憂促短生勝日著忙端取怪妙年得
此未須驚懸知出處非吾事已復星河爛熳晴
和魏衍同登快哉亭

經時不出此同臨小徑新摧草舊侵欲傍江山看
日落不堪花鳥已春深來牛去馬中年眼朗月清
風萬里心故著連峯當極目回看幽徑遶雙林

登快哉亭

城與清江曲泉流亂石間夕陽初隱地暮藹已依
山度鳥欲何向奔雲亦自閑登臨興不盡稚子故
須還

招黃魏二生

出門不雨即遇風閉門值睡極力攻似聞湯鼎作
吟聲已賀勝敵收全功却思二子共一笑撥棄舊
語無新五卒行好步不兩得能致公等吾何窮魏

詩黃筆命未有顧我獨得神所鍾徑源相就踏泥
潦已辦煮餅澆油葱

後山先生集卷第三

